

Ո Ր Ո Շ ՈՒ Մ

Ճանապարհային ոստիկանության վարչական իրավախախտման վերաբերյալ գործով
19.04.2023թ. կայացված ԱՆ057041 որոշումն անփոփոխ, իսկ վարչական բողոքն առանց
բավարարման թողնելու մասին

<< 13 >> 06 2023թ. 7-13- 6025

ք.Երևան

Ճանապարհային ոստիկանության պետ, ոստիկանության գնդապետ Ն. Սարգսյանս,
վերանայելով Լյովա Աղավելյանի ՄԴ/37147-23 և ՄԴ/41200-23 դիմումների քննարկման
արդյունքում ստեղծված նյութերը՝

Պ Ա Ր Զ Ե Ց

Քաղաքացի Լյովա Աղավելյանը (ծանուցման հասցե՝ Սյունիքի մարզ, քաղաք Ագարակ,
Չարենցի փողոց, 24-րդ շենք, 41-րդ բնակարան) դիմումներով խնդրել է վերանայել
Ճանապարհային ոստիկանության վարչական տույժ նշանակելու մասին ԱՆ057041 որոշումը՝
նշելով, որ չի ցանկանում մասնակցել դիմումի քննարկմանը և խնդրել է որոշում կայացնելիս
հիմք ընդունել դիմումում նշված հանգամանքները:

Դիմումների քննարկման արդյունքում պարզվել է, որ վարչական իրավախախտման
վերաբերյալ գործով 19.04.2023թ. կայացված ԱՆ057041 որոշումը ենթակա է կատարման
հետևյալ պատճառաբանությամբ.

Վարչական իրավախախտումների վերաբերյալ ՀՀ օրենսգրքի 128-րդ հոդվածի 1-ին մասի
համաձայն՝ տրանսպորտային միջոցներ վարելու իրավունք չունեցող անձանց կողմից
տրանսպորտային միջոցներ վարելը, առաջացնում է տուգանքի նշանակում՝ սահմանված
նվազագույն աշխատավարձի քսանհինգապատիկի չափով:

<<Ճանապարհային երթևեկության անվտանգության ապահովման մասին>> օրենքի 18-րդ
հոդվածի 1-ին մասի <<գ>> կետի համաձայն՝ տրանսպորտային միջոցի երթևեկությունն
արգելվում է, եթե՝ վարորդը տրանսպորտային միջոցը վարում է առանց տվյալ կարգի
տրանսպորտային միջոց վարելու իրավունքի:

Ուսումնասիրությամբ պարզվել է, որ 19.04.2023թ. ժամը 11:00-ի սահմաններում Մեղրի
քաղաքի Աղեյան փողոցում քաղաքացի Լյովա Աղավելյանի վարած <<VAZ>> մակնիշի
53SL938 հաշվառման համարանիշի ավտոմոբիլը կանգնեցվել է Ճանապարհային
ոստիկանության ՃՊԾ 2-րդ սպայական գումարտակի 6-րդ սպայական վաշտի 2-րդ
սպայական դասակի տեսուչ, ոստիկանության կապիտան Ս.Թումանյանի կողմից՝
<<Ճանապարհային երթևեկության անվտանգության ապահովման մասին>> օրենքի 24-րդ
հոդվածի 5-րդ մասի <<բ>> կետի պահանջի խախտման համար, այն է՝ վարորդն ավտոմոբիլը
վարել է անվտանգության գոտիով չամրակապված վիճակում: Ստուգումից պարզվել է, որ
վարորդը ավտոմոբիլը վարել է Վարչական իրավախախտումների վերաբերյալ ՀՀ օրենսգրքի
128-րդ հոդվածի 1-ին մասի պահանջի խախտմամբ, այն է՝ տրանսպորտային միջոցը վարել է
առանց տվյալ կարգի տրանսպորտային միջոց վարելու իրավունքի, որից հետո ավտոմոբիլը
տեղափոխվել է ՀՀ ՆԳՆ ոստիկանության Մեղրիի բաժնի հատուկ պահպանվող տարածք:
Վարորդի ներկայությամբ և մասնակցությամբ կազմվել է համապատասխան վարչական
իրավախախտման վերաբերյալ արձանագրություն և Վարչական իրավախախտումների

վերաբերյալ ՀՀ օրենսգրքի 128-րդ հոդվածի 1-ին մասի համաձայն կայացվել վարչական իրավախախտման վերաբերյալ գործով ԱՆ057041 որոշումը:

Ճանապարհային ոստիկանության վարչական բողոքների քննության բաժնում, Ճանապարհային ոստիկանության ծառայողն իր գրավոր բացատրության մեջ նշել է, որ քաղաքացի Լյովա Աղավելյանի կողմից կատարված իրավախախտումը հիմնավորող տեխնիկական միջոցների կիրառմամբ ձեռք բերված ապացույցներ առկա չեն, սակայն իրավախախտումը եղել է անմիջապես իր տեսադաշտում, ակնհայտ և պարզ տեսանելի: Ստուգումից պարզվել է, որ վարորդն ավտոմոբիլը վարել է ՀՀ օրենսգրքի 128-րդ հոդվածի 1-ին մասի պահանջի խախտմամբ, այն է՝ տրանսպորտային միջոցը վարել է առանց տվյալ կարգի տրանսպորտային միջոց վարելու իրավունքի, որից հետո ավտոմոբիլը տեղափոխվել է ՀՀ ՆԳՆ ոստիկանության Մեղրիի բաժնի հատուկ պահպանվող տարածք: Վարորդի ներկայությամբ և մասնակցությամբ կազմվել է համապատասխան վարչական իրավախախտման վերաբերյալ արձանագրություն և կայացվել ԱՆ057041 որոշումը: Միաժամանակ ոստիկանության ծառայողը հայտնել է, որ իր և վարորդի միջև ծառայողական բնույթի խոսակցություններից բացի այլ խոսակցություններ չեն եղել:

<<Ճանապարհային երթևեկության անվտանգության ապահովման մասին>> օրենքի 17-րդ հոդվածի 1-ին մասի <<ա>> կետի համաձայն՝ ճանապարհային երթևեկությունը կարգավորող ոստիկանության ծառայողը պարտավոր է սույն հոդվածի երրորդ մասով սահմանված կարգով ազդանշան տալով կանգնեցնել տրանսպորտային միջոցը, եթե ակնհայտ կամ տեխնիկական միջոցների օգտագործմամբ երևում է, որ վարորդը խախտել է ճանապարհային երթևեկության կանոնների պահանջները, կամ տրանսպորտային միջոցի ընթացքը կամ տեղափոխվող բեռը, կամ վարորդը կամ ուղևորներն իրենց վարքագծով ակնհայտորեն վտանգ են ստեղծում երթևեկության անվտանգության համար: Նույն հոդվածի 8-րդ մասի համաձայն՝ երթևեկության սահմանված արագության գերազանցման և տրանսպորտային միջոցների ապակիների լուսաթափանցելիության սահմանված չափի խախտումների համար պատասխանատվություն է առաջանում, երբ տվյալ խախտումը փաստարկված է համապատասխան տեխնիկական միջոցների կիրառմամբ:

Վարչական իրավախախտումների վերաբերյալ ՀՀ օրենսգրքի 13-րդ հոդվածի 2-րդ մասի համաձայն՝ տասնվեցից մինչև տասնութ տարեկան հասակում գտնվող անձինք սույն օրենսգրքի 53, **123-131**, 160, 172, 173, 182, 190-193 **հոդվածներով նախատեսված վարչական իրավախախտումներ կատարելու դեպքում ենթակա են վարչական պատասխանատվության ընդհանուր հիմունքներով:** Հաշվի առնելով կատարված իրավախախտման բնույթն ու խախտողի անձը, նշված անձանց վերաբերյալ գործերը (բացառությամբ սույն օրենսգրքի 182 հոդվածով նախատեսված իրավախախտումներ կատարած անձանց) կարող են հանձնվել, իսկ սույն օրենսգրքի 53 հոդվածով նախատեսված իրավախախտումներ կատարելու դեպքում, որպես կանոն, ենթակա են հանձնման, շրջանային (քաղաքային), քաղաքների շրջանային խորհուրդների գործկոմների անչափահասների գործերի հանձնաժողովների քննությանը:

Հարկ է նշել, որ Վարչական իրավախախտումների վերաբերյալ ՀՀ օրենսգրքի 128-րդ հոդվածի 1-ին մասի պահանջը խախտելու համար արարքը նվազ նշանակություն ունեցող գնահատելու կարգ սահմանված չէ (դիտավորություն, անզգուշություն և այլն):

Այսպիսով, Ճանապարհային ոստիկանության վարչական իրավախախտման վերաբերյալ գործով կայացված ԱՆ057041 որոշումը ենթակա է կատարման:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական իրավախախտման վերաբերյալ գործով 19.04.2023թ. կայացված ԱՆ057041 որոշումը թողնել անփոփոխ, իսկ վարչական բողոքն առանց բավարարման.
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում.
3. Սույն որոշման օրինակն ուղարկել Լյովա Աղավելյանին:

Կատարող՝ Հ.Կարապետյան
Հեռ. 011-54-47-83

